

重修兩淮鹽法志

兩淮鹽法志卷七十八

督銷門

西岸督銷

下

同治八年二月鹽政馬新貽批江西督銷局稟呈吉安分局事宜一案察核所議吉安分局章程第三條吉安鹽行四家是否請過部帖如係納帖開張未便驟然封閉若輩取巧營私固所難免但鹽行與水販呼吸相通凡售鹽等事均由局管僅令其招接水販不授以把持之權於疏銷未始無益應照吳城章程仍准開設每百觔收行用銀一分循案由分局照扣彙給此外無庸另給

津貼如有舞弊情事卽由該道稟請勒閉第四條吉安
銷鹽須撥到省之引據議開一傳單飭令下綱各商願
者運往不特以後壓前輪規紊亂且銷數暢滯無定易
啟商情趨避之端所議殊欠妥善查按成分運之法最
爲公允西岸之吳城鄂岸之武穴皆有成案可循吉安
自應援照惟該局創辦伊始銷數尙無把握究應酌定
成數若干仰候該道到吉安後體察情形速議稟核又
西楚總分各局皆未設有巡丁況吉安城外已咨請西
撫部院派勇駐局中毋庸再設以節糜費

同治八年六月吉安分局知縣程朴生稟查吉安十屬本

係專銷南場安鹽口岸緣居民多種山田每以安鹽入油煎泛攜帶小塊便代蔬菜而且質堅內白滷少堪留居民食慣索購而不可得者行粵鹽時亦嫌砂子瑣碎有特爲重熬成餅者民樂加價爭買可知嗜好有素也但安鹽出產甚稀由於吉岸廢弛有年運商無指買者竈戶遂不經心提剔一概敲碎混入梁鹽以致安鹽缺少其實每次熬鹽靠鍋者卽是并非難辦仰懇札飭運司卽轉諭各場場官通飭垣商自後務令竈戶加工提出碱片另堆搭運瓜棧并飭西岸商人於辦運時各照所請引數搭買二成配運專應吉安民食之需以冀銷

路暢旺經鹽政馬新貽批准

同治八年十一月江西督銷局道員徐志導稟查吳局提引向定三成而暢旺之時往往銷過四成其全數留吳者皆是一二票之小商或值水淺必須起駁之時人手無多不敷照料前經該分局稟懇全數留吳可免暢旺時加提費事卑局前任程道核與輪章無礙姑准照行志導接辦後相沿未改其全數留省者則因吉局銷數未旺已運之鹽存積尙多頗有省鹽業已售清因有二成在吉未售不能結帳者所有派定各商運吉之引不免觀望見在該路願銷安鹽嗣後即可專派安鹽前往

祇須每年有安鹽一萬引配運當可敷其銷數全綱梁
鹽卽可不派矣撫州官店之鹽各商知銷數更微更不
願運見由官店商人按輪領買發售已飭蔣令察看情
形該處售價每觔六十八文今諭以六十文出售約計
開除運費店用之外畧有盈餘儻能暢銷則價尙可減
經鹽政馬新貽批俟試辦數月後立案

同治八年十二月瓜棧道員薛書常詳查吉安所需碱片
在前以二萬引核計凡有具稟請運者均係一律准搭
二成惟刻下存棧之鹽與准搭二成之數不敷甚鉅今
每年祇須一萬引自應一律改搭一成惟照此搭派在

一二千引之大商尙可併票請運而數百引之小商僅得碱鹽數十引爲數奇零裝運不便應否將吉安每年需運碱鹽一萬引照平辰兩岸作爲專岸懇請札飭西岸督銷局於給咨時派定數商專運碱片其餘概運和鹽庶界限井然免其爭買而該商等亦免有和無碱有碱無和牽搭配運之難嗣經督銷局議復飭派數商專運安鹽如平辰兩岸作爲專岸原係正辦且與從前舊案相符但西岸眾商視爲畏途無一願者而事非公溥亦未便以勢臨之強以必從因思平辰專岸係在正額之外若另招商辦自有應募之人然未免占攔正額地

步查見在運吉安鹽一箇月僅銷過二百餘引而梁鹽亦有願買者省局義甯水販亦多販運安鹽每月亦不下數百引前陳每年得安鹽萬引即可濟銷乃合計之約數亦深知瓜棧安鹽不敷二成配搭也爲今之計旣難指派數商又難另立專岸而安鹽萬引實西岸所不可少之需再四籌思求飭下瓜棧於西岸運引普搭安鹽一成准其附梁鹽並運自無零星難運之虞細閱瓜棧原詳已秋一綱買運在前者已搭安鹽二成嗣後卽不敷搭是不免有參差不齊之處若到岸一律以安鹽運吉則苦樂不均必難服眾查初辦分局之時原擬月

銷二千引故請以二成搭配每引於售清後扣津貼運費銀八分今改爲一成自應減半扣費惟吉安銷數旺滯莫必扣費則宜通綱一律以示大公事前若不預定規模則運商結帳卽行無從找扣若運不足數則扣費又有盈餘亦不能紛紛退還運商領取擬嗣後視吉局銷數旺滯以定每月轉運引數而津貼運費仍按通綱每引扣銀四分儻運吉之引不及一成而運費有餘卽歸入緝私項下收支以爲公用庶可伸縮隨時而無窒礙之患經鹽政馬新貽批吉安分局銷數旣滯瓜棧安鹽亦復稀少嗣後運西引鹽據議普搭安鹽一成附梁

並運該局所收津貼運費亦擬減半每引扣銀四分均屬平允

同治九年正月江西督銷局道員徐志導詳據吉安分局委員鮑守孝稟稱據運商鄒福祥等十五家公司同呈稱運到梁鹽待輪日久銷市難期懇請詳准分給護照俾轉運回省發售等情查該商原奉派撥分運二成赴吉濟銷詎料銷數疲滯挨號待輪查無時日兼各商報挂省吳兩局之鹽早經挨售盡淨僅餘此二成一不售清則不能回省結帳商本久懸難資轉運查在吉待輪之商除今稟請者十五家外尙有九家一經通融勢必各

相倣效不特無以應水販之便且亦不成事體若竟不
爲變通又非所以恤商艱莫若將在吉到輪之五十三
號起至七十二號止共約存梁鹽七百九十三引擬將
此二十號截留以應銷市其七十三號以後之鹽概聽
該商轉運回省俟銷數稍暢仍挨次序酌令各商陸續
補運來吉照輪出售是挂輪在前者挨銷已近應顧見
在銷市不能任其運回挂輪在後者既挨銷無期似宜
作權宜之計況將來有安鹽陸續接濟當不患脫檔之
虞且際此臘正兩月銷數蓋亦無多能得二月間果有
起色再爲稟請飭運如此辦理似於通融之中仍寓無

妨公事之意復查分局引鹽運回省城向無辦過成案
卽經職道酌定畫一章程諭令運回各號到岸時以所
領吉局水程持赴卑局呈驗當令編立一冊以爲次序
准其比照淹銷補運之例隨到隨賣庶可體恤商情亦
與輪章不背經鹽政馬新貽批准照辦

同治十年七月江西督銷局道員王必達稟省河爲鹽船
會集之區聞得江船戶往往偷賣腳私并有刁民暗中
收買驛和燒包鹽筋任意灑賣查省城內外鹽鋪甚夥
水販之鹽多由鋪販代賣儻或刁民串同私售似於各
路銷市均有關礙見當緝私緊要之際此風斷不可長

亟應嚴禁以肅鹺綱惟省河緝私祇有江軍礮船程哨及立成堂潘訓導該二員向於上下碼頭查緝彈壓兼爲稽查挑夫偷鹽等事日無閒暇勢難兼顧請添設省河緝私委員每月酌給薪水銀四十兩以資辦公經鹽政曾國藩批如稟派委

同治十二年正月江西督銷局道員王必達稟吳城督銷分局稽查巡緝等事向由分局專員督同差遣委員辦理茲查該局東路係饒州府該府與廣信府接壤每有繞越浙私透入吳鎮一帶又九江府居吳局之北該處爲鹽船經過總匯之區江船夾帶沿途灑賣在所不免

均應巡緝以杜侵銷惟查吳局僅設差遣汪主簿一員
往往查緝或致顧此失彼似應添一差遣兼緝私委員
則東北兩路可以分頭巡緝俾昭周密請每月酌給薪
水銀二十四兩經鹽政張樹聲批准

同治十二年二月江西督銷局道員王必達稟查卑局經
理之徽西兩河鹽倉一所復字鹽倉一所原爲各商堆
儲引鹽而設名曰公倉所收倉租出自商人按次每包
收錢十文查公倉章程空出之廩以到岸之先後定堆
儲之次序故倉鹽多係到岸在前者或四五箇月或七
八箇月即可輪售出倉既速補堆自旺倉租亦因之而

增厯屆扣收倉租係照上倉之數核實造報當各商民未建私倉之時每歲公倉總可上鹽十萬包左右約收錢一千餘串不等除支用外厯有餘存均經報解在案近年以來各商民於省城河干添建私倉以致公倉所上之數不能如舊其見儲者值此引額漸增尅期而計非年餘不能卸出同治十年分摺報上倉鹽八萬六千餘包十一年分摺報上倉鹽六萬五千餘包遞年減少職是之由而倉租項下自十年五月起又報明每年添支更夫工食二百餘串連商裔津貼修理等項通盤酌核歲共需錢七百數十餘串此後以收抵支斷難敷用

因思各處私倉每包每月係收倉租錢九文通年共錢一百零八文較公倉按次每包十文其數倍蓰見在公倉租資日少本屆已挪墊銀二十餘兩若不預爲綢繆將來年復一年愈形支絀職道再四籌思擬請將公倉鹽包改爲每包每月收倉租錢二文通年共錢二十四文較諸私倉租資僅及十分之二在各商固所樂從而倉租亦得補苴經署鹽政張樹聲批准

同治十三年六月儀棧道員龐際雲稟准西岸督銷局張道函稱西岸所銷碱引八年間原請普搭二成當因湘岸亦需碱片此間吉安又初設分局不得已稟請改搭

一成附梁并運以應吉銷辦理至今銷市雖未大起而省吳兩局所銷碱引頗形暢旺察看情形漸有不敷售銷之勢可否將碱引一項嗣後改搭二成或一成半附梁并運總期有增不必定以爲例等因職道查碱鹽一項專銷湘岸之平江辰河兩岸計每年平江運行九千九百引辰河運行一萬二千引又西岸原搭一成照春秋兩綱運行十一萬四千引核算計應搭一萬一千四百引此外尙有鄂岸融銷崇通每年約運二千五百引統計每年共需碱片三萬五千餘引就見在湘西兩岸應運之數通盤核計尙有餘存西岸改搭二成每年加

運一萬一千餘引似可敷運擬請卽照張道來函此後環運西鹽普搭二成碱片以濟岸銷惟場產碱片本無定額歉旺不齊儻遇歉產之年不敷配運自當隨時變通辦理見在西岸銷數不暢如碱片多銷亦屬有益經鹽政李宗義批如稟辦理

光緒元年九月江西督銷局道員張銘堅稟查吉安府萬安縣芙蓉門外爲粵私繞越良口後路必經之地曾奉派撥營勇一哨駐劄該處由良口卡員隨時確探知照會營緝捕復經飭令吉安府屬巡私委員專駐萬安就近會營協同緝辦第該員向住城內前聞該處每遇探

有私蹤旣須由營報知委員而委員須赴縣派差方能到營展轉閒殊多周折卽經批飭移於城外勇營左近駐緝以便隨探隨拏擬請准設巡丁二名每名月給工食銀一兩八錢以資差遣其每月房租銀一兩旣令移劄城外亦應照給經鹽政沈葆楨批如稟辦理

光緒元年九月運司方濬頤詳據儀棧咨准江西督銷局函開西岸碱鹽附梁並運原辦本屬妥協惟每綱碱鹽見在搭派二成其數少而銷路旺輪售較速梁鹽有八成之多挨輪待售不免遲滯局中定章向係按船結帳報解釐金且解某船之釐卽應銷某船之照在各商辦

運如遇一舟全裝碱鹽者則結帳解釐自可照章核辦
如近來售去之鹽多係梁碱其裝一船梁鹽既不能隨
碱鹽同時銷清所扣碱鹽之釐因不能報解卽欲先行
報解則一船一照又不能分兩次繳銷辦理實屬難
函請稍爲通融以後各商運西碱鹽如能令其獨裝一
船固妙儻或仍須梁碱並運卽請將該船梁鹽若干給
發一照碱鹽若干另給一照查西岸梁碱二鹽每票雖
按二八搭派而分裝併裝向係聽商自便今督銷局議
令分船裝運或分填護照查與棧章並無窒礙應請以
後凡遇西岸碱梁併裝之船卽遵飭各填護照一張其

下
碱鹽護照號數卽接填梁鹽護照號數之後註明併裝
一船字樣以便稽核鹽政沈葆楨批允

光緒二年八月江西督銷局道員張銘堅稟查疏通銷路
須輕水販成本成本一輕領運自旺西省行銷淮鹽引
地見在饒州一府受浙私之侵吉安一府受粵私之侵
該二府俱係引地邊界較之粵私侵灌撫建情形路尤
寬闊今經商議除腹內各府循舊辦理外擬請將吉安
饒州兩府路遠縣分按引津貼水販水腳先行試辦見
已委員前往各廳縣會同商酌招募水販核定每月認
銷官鹽引數按照縣分之遠近酌給水腳之多寡以廣

招徠所認之鹽饒屬卽赴饒州鹽棧繳價領運吉屬卽赴吉安分局繳價領運其有不能自行領運者擬令准商撥鹽運往庶水販成本可輕腳費可省誠如憲批遠處有官鹽運到私販自能讓出地步銷路可期逐漸推廣至於某縣每月認銷若干某縣應於常銷之外增銷若干某縣水販津貼水腳若干一俟委員復到卽可次第舉行

光緒四年七月儀棧道員徐文達申據江西督銷局咨開吉安分局近來銷筭次暢存倉碱鹽不及二千引七月內外卽有缺乏之虞查吳兩局亦復所存無多均恐缺

乏查丁丑春新綱業已開辦應請飭催已經投咨各商趕將丁春新綱應搭碱鹽先行併數提前運西以資接濟至碱鹽銷路見在日漸推廣通綱普搭二成實屬不敷即使趕運到岸祇能暫顧目前並祈飭場多煎改搭三成庶將來不致脫誤又據淮南總局稟稱各場見存碱鹽四萬二千餘引擬卽埽數給重連同存棧在途統爲核計西岸暫加一成尙敷本年分配經鹽政批允

光緒五年十月江西督銷局道員張銘堅稟運西碱鹽分撥省吳吉三局銷售向係隨時察看情形按存數之盈絀定撥運之多寡每次派定引數札行吳局於江船抵

吳時督飭各商分別照運又因吉安距省較遠并以先
運到吳之商運吉歷經遵辦在案本年開辦戊寅春綱
普搭碱鹽三成卑局八月間所存碱引較吉吳二局爲
少曾將戊春碱片核定先以一千引運吉次以二千引
運省再以一千引留吳緣目前情形必須如此分布庶
全岸銷市不致貽誤乃見在應行運吉之商經過吳城
後竟有匿不到省者迨經查催到省又復延不赴吉推
原其故希冀後運到省之商抵其運吉之數殊不知船
過吳城難瞞耳目先到者旣欲取巧後到者又奚能強
從亟宜定立章程以杜規避而免推諉查西岸江船向

係運抵吳城換領駁票再行晉省是駁票號數在前者
卽應運吉號數在後者卽應留省嗣後應撥各局礮引
擬請仍由職道察看情形隨時伸縮其運吉之引則按
吳城駁票稽考如有應運不運故意遲延者卽將該商
之引罰歸本綱之末輪售經鹽政沈葆楨批允

光緒五年十二月江西督銷局道員張銘堅稟西岸安鹽
運抵省局轉撥吉安分局銷售所需津貼運費曾於安
鹽普搭一成時稟定按照通綱每引扣銀四分以到岸
十萬引運吉一萬引核計每引發銀四錢仍聲明儻所
運之引不及一成所餘運費歸入緝私經費項下收支

以爲公用歷經照辦並將餘存運費隨時報銷在案嗣因上年吉安銷數暢旺運吉之引較一成之數多撥五千餘引維時撫棧銷市亦旺運撫津貼向在吉安運費項下開支以致所扣運費不敷支用加以丁丑春綱暫搭安鹽三成運費更形竭蹶若仍照舊給發將來愈虧愈多憑何彌補當經酌定自丁丑春綱爲始每引改發銀二錢飭令各商遵照辦理茲因戊寅春綱起西岸安鹽均照三成搭配所議津貼改給二錢經鹽政吳元炳批允

光緒八年二月新商尹泰和稟請專認吉安碱鹽一萬引

經鹽政左宗棠批查淮南引鹽原有專岸行票之別但辦專岸卽不能行票旣行票又不能專岸其勢使然如揚屬之江甘等岸甯屬之上江等岸專商認運皆無票商羈雜其中楚西兩岸旣歸行票何能再辦專岸其湘岸之平江一縣因運碱片歸商另辦當時卽在票商已認引內提出給運並非在票外插入與甯揚之包課認岸不同況查西岸辛卯綱實運六百觔十四萬五千一百二十引見認十七萬引業已逾額銷數疲滯非常礙難將吉安一府抽辦專岸致紊票法而占額銷惟所稱總則事屬切膚散則各相觀望尙屬有見吉安亦運碱

鹽應如何責成已認各商聯絡一氣設法整頓力求暢銷之處候札江西督銷局妥議詳辦

光緒八年三月鹽政左宗棠批江西督銷局臬司張岳齡稟查西岸掣驗卡設於湖口歷有年所商販本無不便之說該處地勢既尙扼要自可無庸移動至商船夾私灑賣最爲岸銷之害金陵下關爲第一重門戶尤關緊要大通新易卡員係久在該卡幫辦素稱得力湖口委員稱職否司事人等有無弊竇該司耳目較近隨時訪察稟辦

光緒八年四月江西督銷局臬司張岳齡詳覆新商尹泰

和請專認吉安一府額引一案今據商人怡和義等稟
稱查西岸碱引按綱普搭三成除分留省城吳城外概
運吉安歸局輪售歷年以來舉凡籌辦緝私疏銷或通
綱捐費以濟公用或分路撥鹽力任艱辛所有一切公
事商等向係聯絡一氣同力合作未敢觀望今奉前因
遵卽集眾妥議僉謂目前要著總以推廣銷路爲主溯
查吉安自同治八年開局至光緒元年先後七載每歲
銷鹽祇三千餘引或四千餘引不等光緒二年商等加
捐經費將吉屬邊界廳縣分別路途之遠近津貼水販
之水腳是年吉安分局卽銷過五千零引三年分又銷

七千六百餘引四年分且銷至一萬八千餘引五六七
三年每年均銷九千數百餘引是加津貼以來銷引暢
旺已有明證爲今之計擬請卽就見成之法力求暢銷
惟有將光緒二年未議津貼各縣之水販再給貼費輕
其成本如此辦理前之銷數既有成效後之銷數亦有
裨益等情理合詳候示遵經鹽政左宗棠批允

謹按當時尙有商人龔謙吉稟請專認吉安皆與尹
秦和一併批發

光緒九年四月江西督銷局臬司張岳齡稟據運商裕大
仁等稟稱竊查西省廣潤門外蓼洲地方原有鹽務公

宇一所名曰立成堂凡運商之到岸驗船水販之赴倉
領引逐日均集於此並蒙委派員友駐宿照料歷久相
安甚屬便利惟公宇地處河干本來屋高牆低計自同
治六年建造至今十有七載風雨飄搖屋已朽壞兼之
迭遭巨浸牆俱敝裂亟宜及時修葺商等公同酌議擬
請將立成堂屋宇從新修造酌量添蓋並將牆垣重砌
一律加高以期經久所需之費業經集眾議定自輪售
庚辰秋綱起至銷竣辛巳秋綱止每票捐銀十兩歸局
扣收以資應用復查總局自前年移入松柏巷新屋以
來運商水販咸稱近便但辦公之處尙覺人多屋少見

在局屋東邊牆外餘有空地應請趁此添砌圍牆增建房屋不特辦事實展更覺防護周密商等此次每票捐銀十兩按通岸三綱三百四十票核算共可捐銀三千四百兩以每票五百引計之每引僅捐銀二分而於公事一舉兩得等情本司覆查無異伏候示遵經鹽政左宗棠批允

光緒十六年九月江西督銷局道員馬先松呈西岸督銷見行章程

一西岸於同治三年正月十三日開設省城總局是年二月並設吳城分局每年運銷十萬引分春秋兩次開

綱每綱五萬引五百引爲一票自癸亥秋綱起由商人運西除吳局酌留三成分銷外餘俱運省歸局輪售所運之鹽先是泰州總局招商認辦至五年十月間定爲丙寅春秋兩綱及丁丑春綱十五萬引花名永遠循環轉運凡售出前檔之鹽卽繳後檔之釐請領咨文接續辦運各商自岸局領咨日起限二十五天到揚局中按旬將給咨日期申報督鹽憲並移運司儀棧淮南總局查考其後檔之鹽名曰預釐每引繳銀二兩由局按月批解揚州淮軍後路收支總局充餉俟後檔鹽筋出售時仍於釐金內撥還商人具領嗣於十年十一月又添

賑捐加運鹽二萬引附入辛未秋綱之末先行併運一次自壬申春綱起連原定三綱十五萬引合計奉派壬申春秋兩綱各五萬七千引癸酉春綱五萬六千引見在循環轉運共有十七萬引

一商人辦鹽運西領有護照船單自儀徵開江而金陵下關而大通而湖口等卡均應聽候掣驗查有票外夾私由卡照章辦理如有包內重觔註明護照由局提變充公船到吳城無論留吳運省應將護照呈繳吳局轉送省局備核其晉省者一面由吳換給駁票護運經過石灰窑釐卡呈票查驗蓋戳放行不得疏漏以杜躐先

壓後或遇冬令水涸江船行至湖口屏風等處起駁亦應赴吳按船換領駁票護運以昭畫一而便稽查

一鹽運到岸商人執持駁票報局由立成堂友人驗明船到先後及所運之鹽係何場分是否老堆取樣送局方准挂號換給號單以俟輪售局中按旬將逐日報到花名引數申報督鹽憲並移運司儀棧查考所有運到之鹽仍按照票提派二成起入官倉堆儲每月每包交倉租錢二文以爲從前流寓在西之商裔經費及修倉之用
在商倉堆者倉租一款局中不問蓋定章倉租應由商人自行埋落也

一西岸鹽價原定六百觔一引售庫平足色紋銀二十
一兩每百觔合銀三兩五錢嗣因銀價過昂民間食鹽
踴貴誠恐官私不敵自同治七年二月初一日起每引
減跌銀一兩八錢所減之價除於月解金陵釐金內每
引派認銀一兩外餘於商人應得本利內銷算見在每
引售銀十九兩二錢每百觔合銀三兩二錢

一商人運來之鹽每引正鹽六百觔滷耗六十觔包索
二十八觔共六百八十八觔分裝八包商鹽由儀徵運
西及至到岸輪售出倉不無滷耗拋灑以致每引觔數
大小申算不能一律向章如有餘觔應提變價充公歷

辦至今餘觔並不常有核計除照正鹽每引扣收釐課局費緝私經費及各公款外餘銀一併給商具領

一西岸鹽釐每引除漕耗包索餘觔津貼商人外每正鹽六百觔原定扣釐金九兩四錢四分自同治七年二月起除金陵釐內派認減價一兩每引實扣銀八兩四錢四分內分解揚州淮軍後路收支總局江西釐金一兩五錢盡分皖釐一兩二分四絲二忽又解運庫課費一兩二錢一分三釐又解九江道姑塘關稅一錢四分又津貼商人棧價銀三錢又給還商人預釐二兩又支存皖釐銀二兩二錢六分六釐九毫五絲八忽內每月

撥解揚州淮軍後路收支總局銀一萬兩餘銀找解金陵防營支應局兌收所有應解之釐每月查照已經售清結帳之引月終截數分款扣出起具文批分別具報向來上月鹽釐於下月初二日起解仍先期會同江西藩司派委文員會同江軍礮哨屆期赴局眼同點封具領并發溜單知照長江水師各汛一俟餉船到汛灣泊協同防護以昭慎重惟九江關稅餉船不能迂道駛解按月將文批同總局印花寄交吳局匯撥由該分局礮船解關以上逐月報解鹽釐按半年一次造冊詳呈督鹽院并移送運司彙核奏報

一西省十四府州內廣信一府例食浙鹽南安贛州二府及甯都一州例食粵鹽南昌瑞州袁州臨江吉安撫州建昌饒州南康九江等十府例食淮鹽所有淮界十府水販鋪販赴省領引每引交銀十九兩二錢以半引起票平色均足價值無訛卽由櫃友填發三聯草票票根存局比對中左票給販收執赴倉領鹽稱友發鹽後將中票裁存批銷櫃友賣鹽之帳填發之票逐日連銀繳內稽核稱友發鹽之帳裁存之票亦一律繳核仍由局將日售引數按旬申報督鹽院並移運司儀棧查考至鋪販留存左票原爲稽查藉官售私而設如下次來

局買鹽應將上次左票交櫃查驗若無左票卽係新開
應將牌名地名補稟註冊又水販運鹽回店應給水程
執照護運所用水程向蓋鹽道關防每張油紅一文於
局用內支送每年約用三四萬張由局編號酌定各府
遠近程限如南昌填昌字撫州填撫字南康填康字各
限十五日吉安填吉字袁州填袁字各限一月瑞州填
瑞字臨江填臨字各限二十五日饒州填饒字九江填
九字建昌填建字各限二十日又南昌之義甯武甯各
限四十日饒州之景德鎮限一月並註明包數觔重經
過釐卡呈票查驗蓋戳截角鹽與照離卽以私論儻逾

限期卽作廢紙以防套搭影射之弊

一吳城分局鹽價每引售銀十九兩二錢另收津貼鹽行銀六分該處鹽行祇有招接水販之責此外繳價領鹽不准鹽行經手該局所收之銀除扣局用外餘銀一併解省仍附送鹽帳由總局與商人分別結算至該局酌留引鹽若干售銷若干按旬摺報省局彙案核轉又吳局售鹽向分潯吳兩字填票所收水販津貼鹽行六分一款除按潯字號銷過鹽數按引剔出撥充潯棧經費外其吳字號津貼於添設瑞昌鹽棧案內稟准減半發給該鹽行銀三分其餘一半提補潯瑞兩棧經費之

不足

一吉安分局於同治八年四月添設該局督銷而兼督捕所有鹽價照章與省吳一律除扣局用外餘銀解省每日售鹽若干按旬摺報總局彙轉查吉屬係銷安鹽口岸各商辦來安鹽報投省局挂號運吉時由局按船給發護照從新起運每引給津貼銀二錢在於吉安運費項下動支船抵吉安以到岸之先後定輪售之次序不准紛爭該局仍將運到船鹽按旬具報省局備查此項引鹽先到省城業經申報到岸其到吉時不再轉報以免重複

一九江鹽棧於同治九年六月稟准開辦凡潯屬水販買運應赴吳局交銀領票再赴潯棧領鹽較之由吳載鹽運潯可免重湖之險可省滷耗腳費俾輕成本而資近便該棧派有委員每月棧用於剔出鹽行津貼內撥給至運潯之引係由吳城分局分撥所撥若干售銷若干亦由吳局於旬報摺內註明查考

一饒州鹽棧於同治九年九月稟准開辦凡饒州水販買運每引於正價外另交銀一錢以爲棧費在省領票後再行赴饒過鹽水販之近便省費與潯棧情形相同該棧派有委員每月棧用於所收棧費內動給如有不

數按季於省局局用項下報銷至運饒之鹽於江船未到湖口之先赴局具報一面由局給文知照湖口卡放行方准運棧到棧後由棧員將護照送省核入省局到岸摺內具報所售若干亦於省局銷數摺內註明報查又饒屬之安仁萬年兩縣從前銷引甚微業已各設官店一所派月商由省撥鹽運店售銷安店每觔售錢五十二文萬店每觔五十四文以就民便所有售價不敷之銀及店用運費耗劬幫夥辛工等項按月由石港卡員摺報隨時於緝私經費內撥補

一撫州鹽棧於同治十年四月稟准開辦先是招募販

商辦鹽運撫設店售銷嗣因虧本歇業故議改店爲棧
每引售銀十九兩二錢由省局收銀發票由撫棧驗票
發鹽該棧派有委員每月棧用於省局局費內支銷所
有具報銷數一如饒棧辦法又運撫之鹽係由省局分
撥每引給運費銀三錢在於吉安運費銀內動支

一瑞昌鹽棧於同治十二年七月稟准開辦查瑞邑係
九江府管轄該縣所銷之引向赴吳局繳價領票再赴
潯棧領鹽水販原稱近便嗣鄂岸於該縣對江之武穴
設一分局初因楚西鹽價相同民間尙知各守引地迨
同治十一年鄂岸鹽價每引較西岸減少銀一兩二錢

水販貪圖便宜越境領買經吳城分局查得水販赴武
穴買鹽多需一番盤費故議由潯提鹽運瑞歸倉屯儲
於瑞昌縣城設棧稱發俾省水販盤費以期楚西鹽價
相埒該棧派有委員每月棧用於核減鹽行三分津貼
銀內厯由吳局併入潯棧經費項下彙案支銷該棧稱
發之引卽在九江府屬之內統作潯棧銷數造報

一義甯州鹽棧於光緒十年五月稟准開辦查該州係
南昌府管轄又係專銷安鹽口岸因與湖北之崇通湖
南之平江瀏陽接壤故就地設棧以保藩籬所運之鹽
概由吳城分局飭商運往所銷之鹽應赴吳局繳價領

票再赴州棧領鹽水販之可免盤費拋灑滷耗亦與各棧相埒該棧派有委員每月棧用概歸吳城局用項下支銷

一粵私侵吉安浙私侵饒州閩私侵撫州均已設卡堵緝其緝私各卡委員每屆一年期滿考核一次亦以獲私之多寡兼察銷引之暢滯酌定功過分別留撤至各卡拏獲私鹽均應解省變價以一半充公一半充賞歷經遵辦在案

一西岸初無月商名目嗣因屢有要公飭商妥議而各號散漫不齊遇事推託光緒二年冬籤定十二家自三

年正月起每家值月一次以應公事

一南昌府屬之義甯州並吉安一府均係專銷安鹽口岸此外淮界各府亦多有赴省領安鹽者各商辦來安鹽向係附梁併運按綱普搭三成

一吉安府屬七廳縣除永甯一縣係由淮商撥鹽運往濟銷外其餘如蓮花廳每引津貼水販銀一兩六錢永新縣每引一兩三錢萬安龍泉二縣每引一兩五錢泰和縣每引八錢永豐縣每引一兩又撫州府屬六縣除臨川一縣向屬暢岸不計外其餘如崇仁金谿宜黃東鄉樂安等五縣每引津貼水販銀一兩蓋因地居淮引

邊界領運疲滯先後議由淮商通綱捐費俾資津貼以
輕販本均經稟定有案

兩淮鹽法志卷七十八

兩淮鹽法志

卷七十八

督銷門

西岸督銷下

兩淮鹽法志卷七十九

督銷門

皖岸督銷

上

嘉慶舊志安徽所轄安慶池州太平三府額行綱鹽九萬四千八百九十七引又甯國一府和滁二直隸州額行食鹽十二萬一千四百九十三引共歲額引二十一萬六千三百餘道其初每引二百斤後漸加至三百數十斤至四百斤非今之每引六百斤比也同治初年曾國藩始定額銷七萬二千引每引六百斤每百二十引爲一票商販謂之小票以別於楚西三岸光緒八年左

宗棠加額一萬七千七百六十引計每歲額引八萬九千七百六十道爲票七百四十有八以四百四十八票環運南鹽三百票環運北鹽然每年實銷不過七萬引上下若無新加之引固亦一暢岸也志皖岸督銷

咸豐八九年總兵李德麟帶紅單船鎮守大通一帶是時大江南北居民移居避亂保全極多會紅單船缺餉由李德麟在和悅洲自行設卡抽收貨釐鹽釐以濟軍需咸豐十一年楚軍東下安省恢復道員劉履祥奉檄到洲辦水釐局兼設官鹽局以濟民食

謹按此大通鎮和悅洲設鹽局之始

同治二年十一月鹽政曾國藩釐定淮鹽運皖章程第一
條斤兩改復舊制第二條大通設招商局第三條護照
另繳軍餉第四條計算成本數目第五條三處截角查
私

謹按以上五條詳載票法新章茲僅標其目以存梗
概

同治三年正月鹽政曾國藩札本部堂見定淮鹽運皖章
程每引六百斤分裝八包每包連包索滷耗八十六斤
運至大勝關應抽查過稱於護照上截去第二角運至
大通又應抽查過稱截去第三角將照繳銷凡有運皖

鹽船經過抽查過稱斤重相符立即截角放行毋許留
難需索如有包內之重斤包外之夾帶亦即照章稟辦
勿稍徇隱其楚西鹽船應由上游卡員抽查該卡不得
羈阻並即遵照仍將驗過販名引數按旬具報

同治三年四月皖鹽招商局道員劉履祥稟呈酌議章程
六條 一示限緝私查金柱關以上大通以下無票之
私停泊不少皆係未奉憲札截留以前而入金柱關者
目前滯銷皆被此鹽侵售之故查大通以下無一水販
來大通分銷官引者此其明證也此項私鹽應請示限
於何日截止 一減釐加課查沿江小河口凡鹽船一

入小河則必完納入口釐金再或行二三十里或五六十里節節皆有釐卡每百斤完釐或四百文或五百文不等查大通新章引鹽每百斤定價三兩若運赴上游過安慶華陽鎮約計釐金水力其成本已近四兩若再入小河越二三卡則成本又近五兩若運往下游除荻港卡免完釐金外一入小河越三兩卡其成本亦近四兩此大通上下之情形也目下官引若非運往四路小河灑賣不足以廣銷路可否減各小河之釐金而輕官引之成本俾南足以敵浙私北足以敵北鹽抑或札飭向食南鹽各州縣不准北鹽浙鹽入境卽准其入境則

請加課以重成本而使官引暢行 一免釐放行水販
赴大通分銷官引運往下游經過荻港應請札飭該處
釐卡見有卑局水程執照驗明免釐放行以免重抽
一輪售保價商販鹽船到岸挨次輪售以杜搶跌之弊
凡行戶售鹽飭令先赴卑局領起票然後過稱稱畢仍
持起票赴局調換水程護運若不輪售必致散漫無稽
且賤售搶跌陽奉陰違最難保價 一嚴杜倒騙大通
鹽行非本地殷實老成之戶往往閉門倒騙商家受累
不淺卑府開售新引之始諭令各鹽行以六家連環具
保方准開設若一家倒騙卽令五家攤賠久經取具連

環保狀在案辦理以來尙無倒騙之虞 一淹消補運查續定章程皖鹽淹消應照附場州縣之例不准報淹補運惟附場州縣多在內河不由大江轉運可免風波之險若皖商鹽船由泰興之口岸開江距大通七百餘里長江之險難保不遇風波在大商富賈轉運數千引或數百引船隻既多成本亦鉅卽遇淹消百十引到岸後勒令補釐取之猶易若本小資微或勉力辦運一票或二三商販合運一票一遇淹消則全船資本盡付汪洋卽勒令補釐終難完結擬請此後如有實在淹消者或准其補運以免課或不准補運以免釐均候核奪經

鹽政曾國藩批第一條無票之私應以該局奉到示諭之日卽行截止由該局派委可靠之員沿江巡緝第二條皖鹽既在大通總完下四卡釐金所有大通以下內河各釐卡自應一概免釐其運赴大通以上仍須逢卡完釐以符定章至皖南之浙私皖北之票私地勢散漫不能仿照楚西扼要加稅應循向例越境均以私論卽飭該局緝私委員遇有前項浙私票私一律拏解究辦第三條荻港卡鹽釐已在大通局總抽該局分銷之鹽運往下游經過荻港卡自不得重抽釐金候札牙釐局轉飭該卡查驗水程執照免釐放行第四條皖岸引鹽

前以大通銷數暢滯無定故刊章內未議整輪茲據稟
若不輪售各販陽奉陰違最難保價自係實情准由該
局仿照楚西按船到之先後挨次輪售以杜搶跌之弊
第五條鹽行倒騙大爲商販之害自應嚴行禁止第六
條淹消之鹽旣據查明皖岸與附場州縣不同准照續
定章程補運以示體恤惟遇淹消之案除報地方官勘
訊出結外仍應稟明本部堂派員勘確必俟批准定案
方准補運並候札飭淮運司知照

同治四年七月署鹽政李鴻章札行大通招商局皖岸淮
鹽每年定運七萬二千引自上年正月起到本年閏五

月止計一年零六箇月祇銷四萬八千餘引照額尙不及半見在江岸食鹽業經招商認定東壩又嚴堵浙私似皖岸鄰私較少何以銷數如此疲滯訪問該局弊端甚多如十號一輪發售前一輪賣完商人不得見銀須俟二輪賣完以後價彌補前價暗抽商本不知作何用處收買客銀十足發賣客銀八九買賣客不令見面由局領價繳價格礙實多又如委員自做遲完票本釐金或與委員認識不必先繳報效銀兩即可發照否則有照亦可謂無又有將輪銷號數提後抵前之事商情不服物議紛騰總由劉道經理不善應卽撤委另行遴員

接辦查有安徽補用魏道承樾廉正精詳堪以派令前
赴大通接辦招商局務查明前項情弊如果屬實詳請
參辦以肅鹺政並訪察該局委員司事弊混者卽行撤
換認真整頓務須恪守定章釐剔諸弊秉公恤商勿任
請託取巧至安徽府屬及東流縣間可銷六成其下游
十三州縣僅銷四成恐有官商夾私舞弊應飭大勝關
掣驗委員張道破除情面逐細查掣並行安徽牙釐總
局轉飭沿途水陸釐卡協同緝私

同治四年八月皖鹽招商局道員魏承樾稟皖鹽每年請
票六百張於泰州分局分半售賣事權不歸畫一似公

而實則營私票在一處則一名不便多領於是有分售
便民之說一次票張兩處並領遂有一人而請數十票
轉售加價弊出百端商民數百而一票難求持挾重資
空勞往返卽有售得一票者加以提輪稱平銀色滯耗
等弊遷延歲月坐耗資本於是來者思歸聞風者裹足
其弊一也鹽船進卡稟請掣驗自有一定之先後迺委
員以情面之有無爲驗船之輪次驗時祇爭須臾而輪
售則遲一二月不等否則私行賄囑亦足以取巧爭先
商民雖已先至亦必落後其弊二也掣驗委員受奸商
賄囑夾私重斤任稱手朦混稱過否則斤兩稍足略出

數十斤亦云包外挾私忿然提去總辦不明轉以爲委員認真掣驗商販祇得忍氣吞聲而莫可如何其弊三也挨輪售銷行客不相對面售價統歸總局兌收於是總辦以客商首輪之利本作爲己資以次輪之售價償首輪之客商以三輪之售價償次輪之客商以次遞推源源相接於是局中委員幫辦相繼效尤開錢店設鹽行購居陟串商販而提輪等弊從此而出在上者無從察其弊端在下者無從訴其冤憤其弊四也票鹽抽釐自應呈繳足色寶紋價銀色低釐捐令其加水而解繳糧臺仍以毛銀湊包販賣食鹽銀色不足行戶錢店令

其補水而兌收鹽價遷延捐卡第能收毛銀以求了事
其弊五也鹽行稱手搬弄手法每鹽百斤不難稱耗數
斤鹽行貪其微利爭覓欺客售奸之人積累成山商本
暗鑠其弊六也船戶盜賣鹽斤動以百餘包計迨至起
輪客商始知盜賣卽經控定將船變價而船價無多不
敷賠補其弊七也鹽色滷水其味難嘗乃有本地無賴
之徒私設鍋竈熬煎包滷滲和客鹽遂使票鹽味苦難
以銷售其弊八也鹽行起買商鹽往往倒行騙價無從
追究遂使客本坐虧痛心疾首其弊九也總辦不明取
友莫端必先引親舊安置委員幫辦司事等差於是薦

託貧緣者沓至雜來又不能不暫爲收留口糧薪水坐
事虛糜其弊十也職道擬請此後泰州分局之票概歸
大通總局備發於護票到局之日出示曉諭令商販報
明登記號簿限以日期約計人名以通票數分派榜示
得以周知如人多票少則從一名而請數票者裁減俵
發僅請一票之人或寫發票二字號籤三百枝又按名
數寫不發二字號籤數十枝令領票者赴總局籤筒內
各抽一枝然後照籤給發保結按結收銀給票庶幾營
私者不敢操其權請託者無庸逞其智局員知懼而眾
心帖服矣恐掣驗之顛倒輪次也見於卡下一里許置

一小划使一勇每日攜號旗二十面俟鹽船進口之際挨次俵發令客商將旗懸挂艚桅不特先後之船其見號次卽岸上之人亦得周知儻或顛倒錯發不但商客登時卽可查出縱使到卡繳旗換票卡員亦卽立知定行嚴辦庶幾發旗者不敢錯亂號次掣驗者亦祇得挨次編輪矣恐總局利權獨握指客價以營次也於是使行客彼此交易售價不歸總局復不准以貨物相抵不准以揮據逾期從此奸宄無把握之術商販無稽延之苦往來稱便利焉又恐行店之倒騙也於是總局設立號簿每夜令行客同赴總局客人親書某月某日某商

SECRET

低色毛銀欺勒商販矣各行稱手甚多業已出示曉諭
儻敢搬弄手法一經商販告發重責後枷置該行門首
商販必不登門船戶盜賣鹽斤必須細察情節如一客
而裝一票自宜雇用大船乃雇小船分載是過在販客
如數客而共買一票則各守各船何至盜賣又如實係
堅厚新船又無長江風暴之遭日久融化之虞而鹽斤
短少是過在船戶自宜斷令賣船賠償庶幾客商自知
謹慎而船戶不敢盜賣矣恐熬煎之足以滲和客鹽也
於是出示曉諭嚴禁並札委大通汛藕把總挨戶巡查
勒令折毀鍋竈有敢仍蹈前轍照以盜賣私鹽例加等

治罪恐掣驗卡之得賄徇私也於是任委明曉大義之員遇有鹽船到卡必親自登岸掣驗不准徒憑稱手侍勇又不時親赴卡查看或令幕友赴卡稽查庶掣驗者無所行其私矣經鹽政李鴻章批據稟如請票以掣籤爲有無查船以插旗爲先後行戶付價禁其貨抵期揮商販繳銀改用寶銀四錠所辦均好此外各層亦悉應照辦泰州分局之稟請島大通總局備發候卽札飭劉守遵照

同治四年九月署鹽政李鴻章批皖鹽招商局稟水師釐金局卡牽抽私鹽之釐已據前稟札飭查禁茲復將所

稟緝獲私鹽應按月報解大通鹽局變價以二成充賞之處札行牙釐總局通飭遵辦據查鳳凰涇等處於官鹽進口時抽收落地稅並無此項章程亦無報解文件保非私收入己仰俟該卡委員向先洛稟復後據實稟候嚴行懲辦以儆其餘所查南北岸透私徑路甚屬詳細如稟於運漕設立分銷局兼緝私鹽並將金柱關緝私經費改併蕪湖分銷局以免虛糜而收實效揚州分銷局既不發票應卽裁撤候飭劉守另候差委所有開江認運查驗等事卽由該道遴派妥員前往接辦以期呼應一氣老虎涇一帶已派水師陳提督駐巡無庸添

卡稽查所裁減揚州分局經費即可節省大江上下私
路太多勢難逐處派巡祇可扼要稽查但有得力之員
不難遙爲控制該道已於蕪湖運漕各設分局此外不
必再設分巡蓋恐照察難周轉滋流弊所請加發四十
票分給大商以廣兩分局銷路事屬可行第須該道確
查大商妥爲分給卽如掣籤一法原足杜請託而示公
平然商販知以掣籤爲有無必致多請數十票以期必
得仍不能絕虛占之弊故雖定掣籤仍須查明商販的
實名姓及上屆請運數目方能得有把握和州釐卡凡
鹽無論官私每百斤概抽錢四百文該州白渡橋有私

行鮑益泰請領告示專賣私鹽候卽派員前往確查核辦又所稟泰州棧商於場戶賣鹽時每包扣錢五文於商販買鹽時加錢五文爲皖鹽分局陋規候密飭棧委程守確查稟復核辦

同治四年十一月皖岸招商局道員魏承樾申奉爵憲批開運銷分局之鹽應酌定每月撥出若干票令各販開江時在於揚州分局呈明願赴蕪湖分銷卽由劉守在於護照上註明分銷何處字樣無論何販均准前往到分局後卽應由分局編輪挨售方無偏枯斷不能專歸大商致小販有所藉口又該岸截留楚引應照上年辦

法給還鹽斤令楚商執持原運楚照前赴楚岸銷售方
免輾轉若給還皖票則先以楚引而銷皖岸繼領皖票
而辦楚鹽未免有紊定章所請另給十票礙難給發仰
卽分別轉飭各分局遵照等因並另奉到護照三十張
職道查下綱發票章程無論大商小販均歸掣籤固可
免偏枯之弊亦不開取巧之端其蕪湖分局運銷之鹽
奉諭應酌定每月撥出若干票令各販開江時在揚州
分局註明何處字樣此舉實屬妥貼之至惟一經分出
註撥設該分局需鹽孔急而各該鹽船久不到岸該分
局勢不能不赴通請撥及卑局撥鹽運濟而在揚註撥

之鹽紛紛接踵而至反致壅滯且恐開避就之端職道再四思維此項分銷之鹽仍應聽候分局隨時截留隨時請撥既無弊竇且免壅滯似覺較爲妥便經署鹽政李鴻章批據申各情係爲便於轉輸起見應准照辦惟分局亦須編輪挨售以昭畫一

同治四年十二月皖岸招商局道員魏承樾申本年春綱皖鹽引票三百張經前辦招商局務劉道請領招商認運在案茲有本年秋綱皖鹽引票三百張奉爵憲批開何公遠提發之三十票仍應歸秋綱三百票內扣算其餘之二百七十票卽由該道趕緊招認籤掣有無等因

職道查春綱引票見經各商陸續運鹽到岸銷數頗暢而秋綱之票本擬開年再行請領旋因各商紛紛赴局掛號僉稱近來場屬買賣須三五個月方能辦鹽起運職道揆之商情誠恐招認過遲難於接濟因卽出示曉諭凡各商認運掛號截至來年正月十五日止十六十七兩日收報效票銀十八日掣籤十九日退還掣籤未得之銀兩二十一二二十三三一四二五二十六三三保結一面填寫得籤票號二十四二十五二十六三日照號發給護票見計掛號已有二千餘票所有秋綱引票三百張除將提發何公遠護照三十張應歸秋綱三

百票內扣算外仍有護照二百七十張理合備文申請
賞准如數發給下局以便趕緊招認經署鹽政李鴻章
批據請皖照二百七十票已飭承趕刷矣仰卽專差來
轅具領至掣籤有無前因商情不願卽經批令一概停
免在案茲據稟稱掛號已有二千餘票請數過多且業
據該道出示於來年正月十八日掣籤亦不便朝令暮
更姑照來文辦理

同治四年十二月署鹽政李鴻章批皖岸招商局稟昨據
該道稟請引票並聲明定於來年正月十八日掣籤業
經批准照辦在案茲閱該道來稟掛號已至二千餘票

而額引止有二百七十票不及一折未免太少本署部堂復加斟酌准再多掣三百票先收報效仿照楚西預行存記庶各商販不得本綱之票或可得存記之引仍於奉到此批之日先行截停掛號以免愈積愈多仰卽錄批出示曉諭

謹按驗資則多非真本掛號則多有空名皆滋流弊票法將窮此後乃定循環給運章程所謂票法參綱法也

同治五年二月皖鹽招商局道員魏承樾稟奉憲臺札發乙丑秋綱護票二百七十張連前提發何商之票共三

百張又蒙添發丙寅春綱存記三百票並准歸併本年正月一律掣籤等因職道伏思未掣籤之先水陸籌餉諸軍紛紛請票乞免掣籤均未允准惟淮湘內湖水陸各軍其各營哨墊發餉項累積巨萬亟應自行籌補均爲職道所深知者因卽曉示各商將秋春兩綱內每綱提出五十票共計一百票以六十票填給淮湘各軍以四十票填給內湖水師此係籌餉急需不歸掣籤其餘四百七十票無論官商一律掣籤均無異議見於本月十五日先收挂號報效十八日齊集各商當面抽掣照籤填發有無悉皆情願掣畢凡退銀收銀發票諸事宜

均尙妥洽經署鹽政李鴻章批仰卽將掣定花名引數開冊詳報並將已收報效銀兩埽解金陵濟餉

同治五年三月署鹽政李鴻章批皖鹽招商局稟該岸引鹽旣據認定六百票計七萬二千引以去歲通年銷鹽四萬六千餘引計之約須年半方能銷竣該岸道路又近足資轉輸嗣後無須另再招商應卽仿照湘岸辦法卽就此次認定之六百票循環給運俟前項引鹽到岸銷出一票卽令該販以原請花名續認後運一票收清報效給予咨文持赴運司衙門及瓜棧買鹽辦運儻不願續運亦准該販呈明由局另招補數其六百票以前

請運各商不在此列

同治五年三月安徽牙釐局布政司何璟皖鹽招商局簡用道魏承樾等會詳奉批開皖鹽向名安字號桐城合肥舒城廬江無爲巢縣滁州來安等八州縣俱與淮南引地錯雜恐致北鹽侵灌淮北改票時提出此八屬爲江運八岸不在改票之列仍歸南商請運應由該道一併勘查設法整頓等因查該八州縣之邊境如桐城屬之樅陽無爲之牛埠土橋等處凡屬濱江一帶地方鈞爲招商局巡緝委員可到之處自出示曉諭後陸續有販至通請銷官引自應責食南鹽不准北私侵入其該

八州縣之內地距江較遠巡緝難周且向來食慣北私驟令改南勢恐不順司道等悉心籌議除領有招商局水程轉運下游內河之鹽應遵會爵部堂暨憲臺批示免釐外如有越境北私侵入已行皖鹽引地仍應遵章拏解究辦若係侵入未經試辦之八岸地界惟有仿照楚西重稅鄰私章程加重抽釐以重北私之成本一面諭招殷實行戶請帖開設鹽行由招商局撥給南鹽試行售賣民間見北鹽價昂將不難舍私而從官此亦漸推漸廣因勢利導之一法其加抽北鹽可否仿照西省加抽閩釐章程每斤抽釐金錢八文之處伏候示遵再

淮北來鹽向由合肥東北鄉經過居多查私販過境往往恃其頑悍抗不完釐且手持器械結黨成羣稍加盤詰卽滋事端縱或有一二曉事之人不敢公行違抗然欲使按斤兩以完釐稅勢亦有所不能此次定章以後擬請派撥一營在東北鄉要卡駐劄以資彈壓而收實效經署鹽政李鴻章批廬滁一帶北私充斥旣據會議請照楚西重稅鄰私章程加重抽釐應如所詳嗣後淮北私鹽除越境侵入已行皖鹽引界仍應遵章拏解外其行銷巡緝難周之廬滁等八岸准按斤加抽釐金以重私本而暢官銷惟當籌辦之初未便操之過急應先

酌抽每斤五文俟試行有效再行察辦至廬江無爲舒
城桐城合肥等縣牙釐局本設有釐卡應卽責成各卡
員兼辦其滁來巢三岸未據牙釐局報設釐卡似應派
委前往察勘有無要隘可以專抽北私鹽釐至請派一
營在於合肥東北鄉駐劄查該鄉路逕歧出繞越處多
民風尤甚强悍若令淮勇在本地查拏亦有流弊應仍
嚴飭該地方官會同卡員聯絡紳衿認真諭禁俟核覆
到日當刊刷告示通頒曉諭也

同治五年五月皖鹽招商局道員魏承樾稟奉批皖岸引
鹽就此大認定之六百票循環給運等因職道當經分

別移行謹擬扣除另招各款開單乞示飭遵 一大商
認運引票較多如有藐法亂章把持壟斷以及過卡不
服掣驗者查出將票名全數扣除 一商夥串通船戶
盜賣引鹽捏報淹消者查出除分別究辦外將票名扣
除 一票商串通船戶夾帶私鹽者查出訊明實情將
票名扣除 一貪圖賤價買辦低鹽及至輪售致滯銷
期者扣除 一認定之票或因資本不足應卽赴局呈
明另招如有私將護照轉售他人辦運及數人合辦一
票者均應扣除 一雇小船以致滲漏融消者扣除
一票商保結應取具的實姓名及五商公聯保結庶便

存查如有捏名具報者查出扣除 一覓雇船戶應取
具的實保結如交單內並無的保任意含混查出將票
名扣除 一鹽船過卡如有賄囑稱手徇私免提等弊
查出與受同罪將票名扣除 一票商有開行收私者
查出將票名扣除經鹽政李鴻章批據議章程十條係
爲杜弊起見惟其中尙有應行商訂者前因掣籤減折
不便於商諸多窒礙是以批令循環給運今該道深恐
拘守此章適啟奸商把持之弊且不願續運者必將輾
轉售賣無復赴局呈明所慮甚是查循環給運原指殷
實商販恪守票法而言若營私舞弊之販自應扣除另

招惟所議先發執照似屬多此一舉且令俟下綱發票之期持照赴局呈驗不獨報效一項未能隨時收解且仍須守開下綱則同時請票又不能不籤掣先後與循環之法命意相左該局已認之六百票宜俟前鹽售出卽由該道確查該販如無別項情弊應令繳清後檔報效立准以原請花名認運後鹽給予咨文辦運不願者聽犯規者扣除庶可收轆轤轉輸之效該販請有咨文應赴淮南總局完繳賞號一欸先行挂號俟已認之六百票將次運竣由運司察看岸局存鹽之多寡銷數之暢滯飭局隨時給發買單買鹽其買鹽次第卽以挂號

先後爲斷又楚西護票見皆由淮南總局給發皖岸續認之鹽自應仿辦以昭畫一

同治五年六月鹽政李鴻章批皖岸招商局稟皖岸分局既據查明應一律裁撤其填給艚單咨報開江等事應歸併運司督飭淮南總局經辦以一事權而節經費

同治五年六月皖鹽招商局道員魏承樾稟皖岸自入夏以來銷鹽疲滯據上游緝私委員暨東壩卡員並各鹽行商販等先後稟報愈稱大通以上官鹽逐卡完釐成本增重遂致私鹽侵入占奪銷路兼之楚西兩岸船戶承包斤兩則包內餘斤與無票夾私沿途灑賣莫可禁

止察其情形總因上游官鹽價貴賣者利其貴而貨私
侵官買者嫌其貴而棄貴市賤情之所趨法所難禁查
大通以上其北岸一帶自王家套起至湖口止其釐卡
十餘處如運鹽至潛太宿望等屬自大通三兩起運至
安慶由安慶而石牌而華陽鎮而下倉埠皆鹽船必經
之處每卡抽釐均四五百文其內河小卡本城坐釐或
百數十文或二三百文不等加以盤撥水腳及到埠加
足稱出售每鹽百斤約計成本合銀四兩四五錢舉此
以例其餘大略價總相似是上游官鹽成本增重如此
無怪其私鹽充斥而官引滯銷也職道曾於上年九月

稟據大通鹽行所陳上游情形懇請免釐一案當奉批駁內開安慶以上皖境無多若酌減上卡釐金恐楚西釐重皖岸釐輕轉足爲楚西之害職道曷敢再行瑣瀆惟查皖岸銷路專在上游之安慶五屬又查楚鹽岸價每百斤刊定三兩五錢運到楚界黃梅蘄州毘連皖岸之宿松太湖每鹽百斤祇合銀三兩七八錢西鹽每引官價二十一兩概不完卡釐運到九江之德化湖口彭澤界連皖南池州之東建而與皖北之望宿僅隔一江每鹽百斤祇合銀三兩五六錢則是皖岸釐輕足爲楚西之害而皖岸釐重楚西又爲皖岸之害見查潛太湖

望並南岸東流建德久無水販至安慶大通分銷官引其明證也且其害不僅楚西將來開辦八岸更恐安慶五屬又受八岸北鹽侵占之害見據上游內河各卡於鹽船過境不問官鹽成本與否增重祇管照章抽釐職道檢查移交卷內並無抽釐之件其舊章如何辦理無從查悉惟曾爵閣部堂批准水程執照載明運赴上游過安慶華陽鎮兩卡仍應照章完釐等字樣則該兩卡以外內河各卡其爲不再抽釐可知伏思皖岸分銷下游由長江轉入內河之鹽已據運商總完下四卡釐金水販不再納釐業蒙批飭遵行在案至於上游分銷仍

於安慶華陽鎮兩卡之外復據內河逐卡抽收自應禁止所有嗣後運銷上游之鹽除安慶華陽鎮兩卡仍照水程內所載遵章完釐外其轉運內河之鹽擬仿照下游內河之例一律免釐以輕官本而敵私侵乞飭下牙釐局轉飭上游各釐卡遵照再水販請給上游水程向以三引起例惟以三引鹽價計之須銀七十餘兩銀數較多水販力有未逮若數人合辦三引又恐分引之後鹽照兩離難於緝私茲擬上游水程更換一引起例以舒商力而便稽查經鹽政李鴻章批查皖鹽運赴安慶以上本祇令完安慶華陽鎮兩卡之釐其轉運內河若

再節節重抽則售價過昂不但累販而且病民自應仿
照下游內河之例一概免抽以舒商力而疏官引

兩淮鹽法志卷七十九